

# Origen Festival Cultural 2007 en il chastè da Riom

■ **(anr/grc) La stad passada è il Festival Cultural Origen vegni inaugurà cun las emprimas producziuns da teater rumantsch en il Chastè da Riom ed en l'entir Grischun.** Las experientschas positivass sco er il bun resun han motivà d'augmentar il program dal Festival 2007. Questa stad gioga Origen en tschintg lungatgs, en quatter valladas, en 20 lieus ed è uschè per l'emprima giada sin viadi en il entir chantun Grischun, sco che l'iniziant e manader artistic d'Origen *Giovanni Netzer* ha communitgà ier a Cuira a chaschun d'ina orientaziun dals meds da massa.

## David e Goliath

Il zarcladur 2006 ha il president da la confederaziun *Moritz Leuenberger* inaugurà l'emprim teater professiunal rumantsch dal mund. La stad culturala 2007 è deditgada al pastur David: al rebel, al chantadur, ed al retg dal testament vegl. Origen gioga en ina entira regiun cun pli che tschinquanta occurrenzas en tschintg lungatgs ed en ventg vischnancas – e collia cun quai il nord ed il sid cun in program cultural unic ed agen.

«Il retg David è ina da las pli impurtantas figuras da l'istorgia culturala europeica. El ha inspirà sculturs, picturs e cumponists tar grandiusas ovras, oravant tuts Michelangelo cun ses David monumental da marmel alv», ha *Giovanni Netzer* fatg a savair. «Origen mussa las differentas varts da questa personalità ambivalenta en quatter producziuns realisadas en la regiun», ha el manegià plinavant. I sa tractia d'ina nova opera rumantscha, cumponida da *Lorenz Dangel*

che descrivia la carriera sanguinosa dal giuven pastur tar il retg. Il concert scenic «When David mourned» mussa David sco um vegl che patischa per motivs da la mort da ses mattatsch Abschalom.

*Clau Scherrer* dirigia l'Ensemble Origen, che sa cumpona da 16 solists, cun musica baroca e contemporana. Ina truppa dad acturs enturn *Sandro Santoro* – tuts ensemen absolvents da la scola da Dimitri – viagia da vischnanca tar vischnanca e gioga in toc burlesc en il stil da la «Commedia dell'arte» che tracta la lutga legendara da David cunter Goliath. *Giovanni Netzer* è respunsabel per il program da quest festival da stad.

## Tematica simbolica

La tematica da David è vegnida tschernida sapientivamain. *Giovanni Netzer* ha ditg: «Ils Rumantschs e cun els tut la populaziun da las regiuns muntagnardas ston batter per lur surviver cultural ed economic. Perquai ha il David, il paster curaschus, ina ferma muntada simbolica en la confruntaziun cun igls Goliaths da noss temp: surtut envers ils profets da las monoculturas linguisticas.»

## La regiun da cultura Grischun Central

Il festival cuzza a partir dals 6 da fanadur

enfin ils 11 d'avust e mussa pli che tschinquanta occurrenzas. Origen gioga per l'emprima giada en quatter vals grischunas, Surses, la Val d'Alvra, la Tumulstga e la Val Schons tutgan tar la regiun linguistica Grischun Central. Il Festival possia uschia dar impurtants impuls contemporans a la pli pitschna cuminanza linguistica da la Svizra e promover la lavur artistica professiunala, è vegni communitgà ier a Cuira.

**Per infurmaziuns supplementaras contactai per plaschair noss biro da producziun: Origen Festival Cultural, Caum postal, CH-7460 Savognin; info@origen.ch, www.origen.ch, 081 637 16 81**



**Philipp Bühler da la Posta sco sponsor, Andrea L. Rassel, manader dal Center Grischun central da LR, Lorenz Dangel, cumponist, Giovanni Netzer, manader da Origen, Clau Scherrer, dirigent, Rilana Cadruvi, cantadura.**